

上饒縣志卷五

山川志 隘塞附

禹平水土表厥山川千古不易圭名斯瞻高高下下阪險
原隰淼淼長波峙此巖業清淑斯鍾雲霄屹立鞏固奠安
閩嶠允輯志山川

上饒縣

靈山在城西北七十里道家書列為第三十三福地邑之鎮
山也山有七十二峯高數百丈綿亘百餘里上有龍池東
北峯挺立孤石宛如人形下有石井石室西峯絕頂有葛

上饒縣志

山川
卷五

仙壇遺址溪五派西流入上饒江唐天寶中嘗有龍居此
遇旱祈之輒應

七十二峯 石屏峯在靈山中其形方正儼若列屏巔有潭
深不可測唐天寶中禱而輒雨因名龍池飛泉瀑布高懸
百丈遠望如練雖數百里外皆見 石人峯在靈山東北
石挺立如人下有石人祠 馬鞍峯在石人峯東形如馬
鞍 棋盤峯在馬鞍東方若奕枰 紗帽峯在棋盤東狀
似紗帽 龜石峯在紗帽峯東形如龜 圭峯在龜石東
廉銳如植圭 雙石峯在圭峯東兩石相聯 花巖峯在

雙石東峯下有巖怪石嶙峋如花瓣 雙峯在花巖南下有聖井旱禱卽應 柘頭峯在花巖南與雙峯相對 鷹嘴峯在石人峯西南高銳如鷹喙 疊浪峯在鷹嘴西數峯層疊若浪紋然 迴龍峯在鷹嘴西山勢迴環故名 黃沙峯在迴龍南兩峯相對下有峯頂院 巖前峯在迴龍西下有養真巖胡昭公學仙於此號松谷老人後居民立祠祀之前有石塘四時不竭祈禱多驗 燃燭峯在養真巖後一峯尖削如插燭 南塘峯在養真巖南 百谷峯在南塘峯前 龍泉峯在南塘西有泉極清冽 笑天

上饒縣志

山川 卷五

二

獅峯在龍泉西怪石突起如獅昂首下有石泉當北鄉孔道有亭名永世亭 水晶峯在遮嶺後懸崖瀑布飛瀉映日遠望之若水晶 遮嶺峯在石洞西遮水晶前故名 疊石峯在石洞西南怪石層疊如疊高懸奇特人經其下望之若將墜者 登樓峯在石屏西山勢疊上如階級歲三伏日人登石屏燃香多從此攀躋而上因呼石階梯其最險處於兩崖石竅中置杙橫大鐵索於上約二丈許行者以手扶索循崖而渡稍下視則驚怖矣 粧臺峯在石屏東形類鏡臺 粉盒峯與粧臺峯石圓如粉盒 掛

衣峯在粧臺東形似衣桁 望郎峯在掛衣東峯石如人翹首俗呼老嫗峯 白雲峯在石屏西白雲常覆其頂 草堂峯在白雲南下有草堂相傳胡隱君居此 披雲峯在白雲峯下兩峯相接故名 聚講峯在白雲峯之西數峯列峙若聚講狀 鼠捕峯在聚講西狀類伏鼠 甌峯在鼠捕西石如甌 東臺峯在甌峯西下有東臺菴 鞋峯在東臺右石形如鞋 朝天龜峯在鞋峯西形如龜昂首 老鴉峯在東臺西石似鴉 石佛峯在鴉峯西峯石如人跌坐 天梯峯在石佛西石有天然階級可拾而登

上饒縣志

山川 卷五

三

俗呼上天梯 中臺峯在天梯南下有中臺菴明養菴禪師居此 插旗峯在天梯峯右石竅圓深可卓旗下有洪梁洞 方石峯在中臺西石形方正如琢成 龍頭峯在中臺西山石陡起高懸如龍頭其下可列騎而過 圓墩峯在龍頭西石圓如土阜 靴石峯在圓墩西形類靴 老人峯在靴石西狀如人盜背 西臺峯在老人峯西下有西臺菴 水尖峯在西臺右水汨汨自石中出西流入溪 華表峯在西臺南兀然一柱形類華表 龍鬚峯在水尖西翼然倒垂如龍鬚 石合峯在龍鬚西兩石相合

人潛聲撫之則動搖發聲則否又名搖石 葛仙峯在西
峯絕頂高不可卽相傳葛仙翁修煉處壇址尙存 鳳凰
峯在石屏西兩峯對列如鳳凰交鳴 石獅峯在靈山東
北狀如獅 九牛峯在石獅南狀類牛數有九 員山峯
在石獅西下有員山菴 春鳥花峯在員山西石色紅如
杜鵑 天馬峯在石人峯北狀如奔馬 天半月峯在天
馬東北形如偃月下有泉潺湲不絕名北澗響泉 五洋
峯在月峯北以地有五洋得名 黃泥峯在月峯西山多
黃土亦名黃土嶺有路通徽饒境 道士仙峯在靈山北

上饒縣志

山川
卷五

四

相傳有道士修真於此後仙去下有洞風氣往來輒有聲
名仙洞鳴琴 頂心峯在靈山北羣峯之中其峯獨尖聳
下有龍泉水常溢出名陽際靈湫 三十六尖峯在靈山
北震峯森列銳如卓筆凡三十六數 銅峯在靈山北石
色如銅其麓有七星潭天然石穴清可沁心數有七象似
天之北斗 白石峯在銅峯西色多白 高城峯在白石
西環峙如城最高峻 船石峯在高城西兩石形如船
上下南峯在高城南有高低峯相接 齊眉峯在南峯西
兩峯並峙如列眉

明夏言詩立壁峭巖森似戟攢峯縣嶠蹙如螺九華五老
虛攬結不及靈山秀色多

明鄭以偉詩靈山七十二面面生奇峯如琢亦如削或開
玉芙蓉金陵分鼻祖甌越真附庸臣嶽爲三老邀廬成六
宗水晶空浪志丹竈隱遺踪中有太上老巖居失秋冬時
登絕頂坐隔世雲重重安得從之遊誅蘿架雲松

國朝鄭日奎詩茲山何秀拔百里引瞻視人代幾戰爭山自
終古翠攢峯七十二奇詭不一致雷雨隱其中日月跳相
避深窈望不盡但驚截業勢應有採芝人高隱雲深處我

上饒縣志

山川
卷五

五

欲往從之究此山中趣年年遊屐阻臨風空感喟

山爲府治鎮山故首列之

前志

銅塘山卽封禁山詳後阨塞

山爲阨塞重險故繼及之

前志

南屏山在溪南從狼牙山發脉拱抱府治如屏又以形如奔
騎別名天馬山宋趙汝愚建南臺於上後廢旁別建謝文
節公祠今奉主同文文山合祀於信江書院春風亭朱夫

子祠

狼牙山一作瑯琊山在南屏山東以峯勢尖聳故名中有東

嶽廟後爲文昌殿左爲聖母殿右爲睢陽祠

道觀山在溪南山石雄踞爲邑治右障上有谷神道院舊志
有溪山堂含輝閣樂歲樓信美亭皆廢前知府張國楨創
曲江書院於山麓後知府周錞元葺爲鍾靈講院知府陳
世增改爲紫陽書院乾隆四十六年知府康基淵改爲信
江書院此山并人院基上建萬錦書屋有記詳書院

文筆峯在溪南山峯秀拔與府學相對故名

鐘山在溪南祥符寺前形如覆鐘上有跨鶴臺已廢

鉢盂山在溪南祥符寺當佛殿前形如覆盂

上饒縣志

山川
卷五

六

茶山在城北詳見古蹟志

五馬嶺在邑城西北二里許刺史姚驥因訪茶山陸鴻漸道

經此故名

以上皆附治近山

前志

吉陽山在縣北十五里崇孝鄉縣之少祖山也旁有蓮花石

皴文如蓮瓣坐可移日

王汝弼秋日登吉陽山詩秋風生短袂乘興偶然來蓮石

晴雲掃松堦暮靄開僧殘知寺古山合見龍迴破帽簪花

倒相看不厭顏

王大堅遊吉陽山詩有一客恰分花一片花心陳設蓮花
宴之句

烏鷹巖在縣北明遠鄉靈山南麓時有鷹巢於此故名今爲
僧舍

石城在縣北明遠鄉靈山南麓峭石壁立週環如城前有門
中寬廣可廬而居避寇者多入其中蓋天然險隘也

鰲頭嶺在縣東北八十里靈山鄉

柘嶺在縣東北八十里靈山鄉

鉛石山在縣北四十里石人鄉石屏秀峙巖壑瑰異清池峻

上饒縣志

山川
卷五

七

嶺與靈山低昂山麓有真武殿大士堂左下有鉛嶺巷曲
仄盤旋爲北鄉之勝

三十六折嶺在縣北安輯鄉盤紆曲折凡三十六數始達嶺
表

石橋山在縣西三十里石橋鄉其上平坦如橋山半一穴嵌
空遠望如月又名月巖宋朱喬年有鑿透巉巖不記春山
腰千古掛冰輪之句

唐韋莊經月巖山詩驅車過閩越路出饒陽西仙山翠如
畫簇簇生虹霓羣峯若侍從眾阜如嬰提巖巒互吞吐嶺

岫相追攜中有月輪滿皎潔如圓珪玉皇恣遊覽到此神
應迷嫦娥曳霞帔引我同攀躋騰騰上天半玉鏡懸飛梯
瑤池何悄悄鸞鶴烟中棲回頭望塵世露下寒淒淒

宋陸放翁詩云幾年不作月巖遊萬里重來已白頭借問
連娟何所似平羌江上半輪秋

元趙孟頫詩月巖如偃月風泉灑晴雪仙境在人間真成
兩奇絕

毬石一名緝女石在縣西三十五里石橋鄉山頂如毬又名
毬石

上饒縣志

山川
卷五

八

天泉巖在縣西石橋鄉雲洞側中有僧舍不假瓦覆巖盡處
有泉自石罅出涓滴不竭幽勝與南巖埒

呂懷詩杖竹來雲洞縈紆一徑微珠簾晴欲捲玉漏點初
稀北闕星辰近南山日月輝看泉過別島不息是神機
蘓春詩斜陽頽澹萬株松下蒼苔鹿豕蹤莫道仙巖難
訪問白雲堆裡一聲鐘

九仙巖在縣西二十五里石橋鄉巖心有石大如箕四時常
潤天欲雨則聞滴溜聲

明楊時喬詩鍾靈佳氣滿山浮蒼蘚嵐烟翠色幽漏滴半

空傳雨信臺陰十里障江流龍飛漢表雲歸鉢虎嘯林邊
風到樓我問山僧能解意夜深燈火爲人留

黃沙巖在縣西四十里石橋鄉空嵌可容百人巖後有兩泉
自石出溉田十餘畝

以上自一都至三十四都諸山

前志

龍潭石在縣西五里開化鄉舊爲長吏遷擢宴送之所饒江
豐溪二水合流至是有石矻然雄踞溪澗下匯重潭名君
遷潭餘詳古蹟志

烏龜山一名五桂山在縣西南五里開化鄉諺云水打烏龜

上饒縣志

山川卷五

九

石信州出狀元宋徐元杰嘗應其讖云

烏石山一名溪旁山在縣南七十里開化鄉形勝巉巖如累
黑玉山半有穴橫深十餘丈中有石觀音一座

仙山在縣西二十五里開化鄉山勢幽絕欲雨則雲蒸明崇
正間守道貢修齡建龍王殿於上下有龍井雪壇相傳山
巔有空棺村民迎以禱雨輒應禱畢昇至山中翌旦視之
則上升稱之曰仙板

明鄭邦福詩住世心情無一分巖棲借此實離羣獼猴絕
壁行相戲鸞鶴層霄坐或聞仙蛻已知飛白日空棺猶自

閣重雲到來岑寂休虛度更起焚香誦玉文

居山一名金鐘頂在縣西南十里開化鄉有徐兵馬祠

粧臺山在縣西三十里開化鄉圓類粧盒與毬石相對有鄭平真仙廟

焦石在縣西二十里開化鄉石色赤黑面瞰溪流上有古亭爲往來津渡處

接巖在溪西南十里開化鄉石室寬廣僧舍數楹唐大義卓錫處後廢明天啓間僧三應復建教諭彭份書接巖二字鑄於巖表王燦有記鑄石上

上饒縣志

山川卷五

十

曹鳴遠詩懸巖落松關怪石寒雲護中有無字禪靜者自能讀

曹鼎望詩聞道接巖好今朝始快登千竿環翠壁一窟納羣僧山僻塵緣淨林深秋色增冷然石上坐人澹竟如冰白雲巖在縣西二十里開化鄉巖谷幽異隱隱在白雲中明養菴和尚創梵宇於此

過巖在縣西開化鄉雲洞後

一線天洞在縣西三十里開化鄉雲洞前峭石劃然中分一線

明鄭邦福詩鐵壁雙闕一徑衝似龍獅象列諸峯只疑山
鬼深林出忽起廚煙隔竹濃入坐儼然天尺五望雲如脫
夢千重三生石上俱忘盡可怪詩魔一再逢

雲洞在縣西三十里開化鄉天欲雨則興雲

宋韓元吉詩揮策度窮谷撐空見樓臺丹崖幾千仞中有
佛寺開老僧如遠公應門走蓬萊下馬問所適寒衣指崔
嵬飛欄倚石磴曠蕩無纖埃坐久意頗愜爽氣生尊壘仙
棺是何人白骨藏莓苔舉酒一酌之慨然與我懷丹沙固
未就白鶴何時來不若生前樂長嘯銜此盃

上饒縣志

山川
卷五

十一

明楊時喬詩何年飛錫指南來一振懸空地脉開山聳自
宜無暑到洞深儼若待雲堆幾層塵室虛僧榻半壁松陰
待舉杯誰道人天長縹緲獨憐鐘鼓響蒼崖

鄭邦福詩碧天連夜洗新秋與客雙趺最上頭月白臨巖
堪自捨心空無語亦相投竹根石劃虬龍窟峽坼靈通虎
豹柔願共此生常此際一龕之外復何求

天靈洞在縣西二十里開化鄉石室深邃內有天窗映日俗
呼透光巖

以上自三十五都至四十都諸山
前志

龍蟠山在縣南五十里乾元鄉嶺有葛仙廟

馬鞍山在縣西四十里乾元鄉一石旁溪形省馬鞍

按此山當郡城水口舊志形勝志所謂西有黃沙馬鞍諸嶺是也近爲取石者鑿傷過半形家過之輒咨嗟太息而無如何彼視爲利藪罔顧地脉不至鑿盡不止有守土責者若加以厲禁保全形勝未必不有大造於茲土也

包公尖在縣西南乾元鄉接鉛邑界一峯尖聳奇拔

黃沙嶺在縣西四十里乾元鄉高約十五丈

上饒縣志

山川
卷五

十三

羊石在縣西南二十里乾元鄉石突起高十數丈儼如羊眠肢體皆具前石迴顧後峯環列明侍郎葉鏗家此因名曰羊石里

八仙臺在縣南六十里乾元鄉峭石高聳寬廣如臺居民祀八仙於其上俗傳有上下八洞云

雲巖在縣南六十里乾元鄉巉巖峭拔雲氣往來中空如室有石觀音半面羅漢等形宋理學余正叔構廬讀書其中洪巖在縣西南三十里乾元鄉臨溪一巖中有僧舍周圍竹木幽陰可玩左有洞穿透經遊者出入儼如石門

柱石巖在縣南六十里乾元鄉峭石拔起屹然一柱中有巖相傳徐仙姑得道處

南巖一名盧家巖去縣治西南十里朱子讀書處豁然空嵌可容數百人巖下朱子祠及僧舍十數楹不假瓦覆雖大雨無簷漏聲有文公祠大義石一滴泉千人室五級峯百丈壁開鑑塘濯纓井八景歷代名人多題咏焉

晁謙之詩南巖夫何爲山作天倚蓋山南溪山復飛頂覆其外初如鵬將翔鴈繫羣麓背乍似海獸嘯呀口險而噉當空橫廣額架屋喉舌內嘗聆釋氏說仰覆各世界千間

上饒縣志

山川
卷五

三

未可著五畝良不隘清冷氣射人熱惱從此潰崖奔木疎瘦谷遠鳥幽怪竭予與二子高興偶相戒松舟下清江毛髮數鰕鱗籃輿上峻嶺幢節望杉檜李侯勳門胄文采山作繪趙君儒林孫娉美蘭結佩不爲城府遊繼此日于邁寧知老逾拙意在精賞退得居溪南山食飲與山對夔魍入奧突雲雨出神滄顧此誠未逢欣然與心會彭湖兩崖蹙泉作一線霈禪月古臺空靈山自明晦平生所驅使詩酒俱好在天涯得吾侶物外從所快便欲登赤城一觀天

宇大

朱晦菴詩南巖兜率境形勝自天成崖雨楹前下山雲殿
後生泉堪清病目井可濯塵纓五級峯頭立何須步玉京
李空同詩巖高屯屋巨谷邃至跡罕仰之訝天缺登頓陡
雲滿木零鶻巢露松冷猿嘯緩一滴聆不厭五級裊可踐
葉鶻歌天匠雕龍構倏忽沙壤爲鱗石爲骨昂頭指欲排
天根蟠旋便已成雪窟嶽崎空洞屯飛廈巉嶙穹窿驚欲
下金衣丈六天竺來木馬嘶風駐南野芙蓉翠削山之東
披茸踞豹多奇踪五級峯頭蘚封磴登閭縹馬窮鰲龍玉
盤承露有餘瀝泉根滴滴通靈石烟波到處結奇遊翻吾

上饒縣志

山川
卷五

十四

刻迹詩畱壁美人攜琴坐石旁林橫黛翠如錦張巖浮雲
際月窟近秋風散下黃金香樵歌款乃迷歸路林暉落照
巖先暮新礪古錯墨題處正對嶺頭一株樹

以上自四十一都至四十五都諸山

前志

鐵山在縣東南六十里永樂鄉舊常冶鐵後竭更名丁溪山
銅山在縣南四十里永樂鄉方輿記云下有天井廣丈餘有
石倒懸如蓮花其水碧色莫測深淺春夏不竭天欲雨井
中卽白霧上騰

湖古山在縣南百二十里永樂鄉山巔一池中有龍井江元

帥廟在焉祈禱多應因名其池曰聖塘

錦屏峯在縣南六十里永樂鄉周邨山色秀麗端立如屏嶺
平正舊建禹王廟下有周氏天恩堂

紫草山在縣南七十里永樂鄉山勢從巖綿亘二十里有古
佛寺已廢

雞鳴峯在縣南永樂鄉周邨兀然挺拔如雞翹首下有宋狀
元徐梅堃故宅遺址尙存

五彩峯在永樂鄉雞鳴峯左五峯疊峙勢如潮湧蔥蘢蒼翠
秀色可人明知府金銳過其地望而喜曰峯嵐多彩色因

上饒縣志

山川
卷五

五

以五彩名之

鶯山嶺在縣南八十里永樂鄉高峻紆折垂五里許通閩界

岑陽關

高洋嶺在縣南八十里永樂鄉峻崢崢高峻升降凡十里許嶺

南卽高州

鐵山嶺在縣南八十里永樂鄉路可通閩

斗米嶺在縣南八十里永樂鄉路通閩省相傳嶺有石隙曾

出米飯僧故名

岑陽嶺在縣南永樂鄉嶺勢巖崑上侵雲表攀躋者肩踵相

接江閩自此分界設關戍守

北嶺在縣南八十里永樂鄉其嶺寬廣約百畝居民卽山種
藝儼成村落山泉灌溉四時不竭嶺南接岑陽關

西巖在縣南六十里永樂鄉巖門有石如鐘覆地中有懸石
如螺滴水味甚甘冷

以上自四十六都至五十六都諸山

前志

大橫嶺在縣南五十里來蕪鄉當入閩孔道山石陡起橫亘
直出溪澗故名

虎隘嶺在縣南二十里來蘇鄉

土饒縣志

山川卷五

共

冷水嶺在縣南二十里來蘇鄉崖石突起下瞰溪流丁溪南
行至是匯爲潭水深而冷故名

七峯巖在縣南二十五里來蘇鄉巖壑奇秀唐淨空禪師卓
錫處巖陰屬廣豐境

木洲山在縣東南十五里上饒鄉山勢截臬爲邑治左障

青金山在縣治東南三十里上饒鄉三峯鼎峙鵝峯尤爲秀
拔多洞壑怪石中有漢高帝廟祈禱輒應山陽接廣豐境

秦峯嶺在縣東五十里上饒鄉形勢高聳圓如覆釜一名雞
籠山上舊有廟下爲秦山寺

黃尖峯在上饒鄉接廣豐境山半一巖中祀八仙

青巖山在縣東三十里太平鄉有古寺

明鄭邦福詩薰風長日繞迴廊飯後尋僧納晚涼自嘆俗緣猶未竟襟裾空帶積廚香

山虛泉響穿深樾水淨魚痕斷初月兩間物色無人收天意分畱與英發

黃巖山在縣東五十里太平鄉山半有巖如室中有泉自石竇出味甘美上有觀音殿潘元帥祠其巔高圓如甑俗呼

飯甑山

上饒縣志

山川 卷五

七

以上自五十七都至七十都諸山

前志

羊角石在靈山北有石岐如羊角

馬蹄石在石人峯下李將軍祠前相傳神助王師討賊馬足躡石蹄痕宛然時有泉溢出飲可愈疾

宋姜夔詩青壁高懸雲氣堆將軍從此識龍媒至今芳草寒泉外猶似當年破賊回

信江唐李翱謂之信河朱子謂之高溪發源三清山麓水玉

洞龍潭曰金沙溪流一百二十里至玉山東津橋上合大

橋溪 江山界 水至玉虹橋上合下鎮溪 江山界 發源 水匯為大

玉潭卽古所謂玉溪水溪者至西濟橋玉瑯溪源出懷玉山麓八傑

龍潭水會焉其流始大西經廣豐界至郡城南門外西南流

經鉛山縣之河口鎮合諸溪之水亦曰大玉潭通志信江最深澄處

過興安縣境經弋陽貴溪縣城至橫潭出郡境經流四百

三十里七邑溪流匯焉在玉山曰玉溪水溪在上饒曰上

饒江弋陽曰弋陽江曰葛溪貴溪曰蕪溪隨地異名皆此

水也出境抵饒之安仁縣餘干縣之龍津瑞洪匯鄱陽湖

入江明費宏題廣信地理圖云信之境東浙南閩西北接

撫饒山之大者懷玉鵝湖龍虎皆有聞於天下高溪水貫

上饒縣志 山川 卷五

其中清澈湍駛府志

按一統志云上饒江府治南上流會諸溪下經弋陽貴

溪流入饒州府境卽朱子所謂高溪也

唐張祐詩碧溪行幾折凝櫂宿汀沙角斷孤城掩樓深片

月斜夜橋昏水氣秋竹靜霜華更想曾題壁凋零可嘆嗟

李華寄趙七侍御詩并序自餘干谿行經弋陽江至上饒

山川幽麗思與雲卿同遊邈不可得云搖漿曙江流江清

水復重心愜賞未足川回失前峯陵灘出極浦曠若天地

通軍陽青嵯峨開拆混元中九潭魚龍窟仙城羽人宮陰

奧潛鬼物精光動烟空蒼猿啼深瀧白鷗戲葱蒙飛湍鳴
金石激溜鼓雷風雨濯萬木鮮霞照千山濃草閒長餘綠
花靜落幽紅渚烟見晨鈞山月聞夜春覆谿窈窕波涵石
淘溶溶丹邱忽聚散素壁相奔衝白日破昏靄靈山出其
東勢排昊蒼上氣壓吳越雄迴頭望雲卿此憾發吾衷

放生河府南門外鍾靈橋上下一里許知府張國正設禁網
罟久而弛廢康熙五十年知府周錚元乾隆三十一年知
府李鏐四十五年知府康基淵迭加禁飭

附馬道畊記廣信府故高溪也由南郭暨鍾靈橋上下

上饒縣志

山川
卷五

十九

延袤里許前郡守張國正勒石兩間曰放生河禁網罟
之入積之有年滋生日蕃魚若有知咸趨聚於中喂噉
噉噉以億萬計憑橋楯觀之從容而樂往來者指此不
啻濠梁間張守解組繼之者佯弛其禁以爲非儒者之
務漁之黠與民之無賴競取之而魚又若有知咸趨以
散去亦幾年所矣今太守周嵩山錚元至復嚴其令漁
盜民竊舉寘之法屬司橋者主守之魚仍若有知咸趨
聚如故易曰信及豚魚聖人豈欺我哉余維太守推人
及物盡我之誠而孚物之應不期而至若有靈然設向

水濱而問之將曰子非我安知我之不知乎吾當質之
莊生

水磨灘在城西半里許灘石纍纍至秋輒涸舟行維艱
君遷潭卽龍潭

廿里潭在縣西三十里水深停蓄兩岸石壁如削凡二十里
餘

牛眼灘在縣西二十里中有兩石如牛眼水勢震急舟行時
有觸溺之患

白石潭在縣南三十里來蘇鄉冷水嶺下岸多白石因名

上饒縣志

山川
卷五

二

梅潭在縣西四十里乾元鄉接鉛邑界

五里淤在縣東四十五里太平鄉明大學士鄭文恪世居此

鄭文恪詩水流百里忽瓊瀦潭樹稠圍五里淤沙圃盡栽
諸葛菜水田飽喫任公魚草堂更在玉山下仙子清分黃

石餘圭里卽今還上世相親箇箇說佃漁

沙溪在縣東五十里

鄭文恪有詩云履聲新轍北門扉詔許沙溪薜荔衣

以上中流大溪水

前志

九股松溪在縣西十五里開化鄉岸有古松一本九榦經千

百年蒼翠如常故名

靈溪在縣東北二十里發源靈山背德興縣分水嶺下經興安縣姜里村入縣界經東汪鄭家坊臨江湖流一百四十二里至靈溪入上饒江

明夏言詩纔向龍岡掃墓田靈溪又泛鄭坊船長安十載松楸夢今日家山聞杜鵑 又入靈溪口詩危橋跨水玉虹流渺渺春波畫鷁浮百里雙溪初入口龍岡山下是源頭

櫛溪在縣西十里開化鄉發源靈山西南流入上饒江岸多

上饒縣志

山川卷五

三

櫛木因名或以眾流所會故稱諸溪

靈山水在縣東北二十五里崇孝鄉源出靈山南流百里入上饒江可通舟楫

宋溪在縣西八十里石橋鄉源出靈山西流百二十里入上

饒江相傳宋氏曾居溪側唐天寶六年勅改爲宋氏水

以上北岸支流小水

前志

鯉洋在縣東六十里太平鄉鄭文恪讀書於此

鄭文恪以偉詩鯉洋堪入龍眠畫更恐幽深圖不窮菰蒲釣艇雨聲外橘柚人屋炊煙中經年憶此江水綠有客未

返山花紅京邸裁書寄小阮庭柯無恙予將東

破石水在縣西六十里乾元鄉源出建陽界北流六十里入

上饒江可通小舟

峙溪在縣西二十里源出石橋鄉東流五十里入於永豐溪

可通小舟

瀘溪在縣南五十里乾元鄉水自古良北流入上饒江

古良溪在縣南五十里永樂鄉源出銅塘西流與丁溪合入

上饒江

北溪在縣南六十里乾元鄉宋理學陳才卿故廬有竹林居

上饒縣志 山川 卷五

址尚存

以上南岸支流小水 前志

生生泉明嘉靖丙午刑部郎中翁大立所鑿舊在行臺廳事

左今以其地創建試院井在頭門內西

翁大立記嘉靖丙午予以刑部郎中審錄江西逾年五月

至廣信卽御史臺居之將復命從吏皆病疫臺中有怪物

狀類狗而大每夜分卽來來卽食廚具去繚垣無竇扃戶

皆弗啓也時信城中亦病疫民間鳴金伐鼓驅疫鬼聲徹

昏曉從吏聞之又言有怪物事皆恐恐畏死泣且告予予

曰妖不勝德果怪物也卽殺之耳予乃肅衣冠藏燈密室
待之夜分果來命隸人遮擊擊數百乃死疫者疑稍解然
召醫診視終弗愈忽夢神人語曰君從者病惟天一生能
治之明日且至明日爲六月朔也予密起戒門者曰有稱
天一生者至毋畱門日晡無報至者予循除散步且疑且
思忽堂之西偏有地津津然以物發視至尺許清泉湧出
竇從乾方來若瀆沫狀飲之寒且甘予喜曰天一生水神
人告我哉遂命疫者人飲數瓢飲卽愈旣而城中疫者羣
飲之無不愈者予乃命工採石甃爲井或請名之予曰生

上饒縣志

山川
卷五

三

者天地之大德仁者人心之生理猶夫泉也生生不息故
地道以泉生萬物聖人以仁生萬民予祗奉德意爲繫者
求生得茹寃者疏請白之法可殺情可原者輕之得不死
其他未減有差皆聖人生之也泉之應殆以是焉顧予淺
陋聞於情款雖蚤夜滌濯以究所謂生生之者猶恐深文
巧致未易繹思使聖人之澤溥於弗鬯泉雖清流或壅矣
名之曰生生山因以自鏡焉越十年丁巳予以江西按察
使至明年正月擢廣東右布政使兩過之酌而酌曰泉不
負予予胡可負泉也遂銘之銘曰井欲收弗使覆我不潔

泉請竭

收泉在府學門以東

方豪銘高不谷卑不溢井其井勿用幕

南池見古蹟志

官井在城隅闌闔坊又名義井宋嘉泰間義門鄭安壽修尋
圯明萬歷癸巳鄭柯翁元勛等再建

蒙泉在孔雀院

化雨泉在信江書院內井深澄味甘而冽盛夏不竭善釀者
咸取汲焉

上饒縣志

山川
卷五

三

新月池在信江書院後鑿石爲池規如新月檻泉側出大旱
不涸

洗墨池見古蹟志

陸羽泉在城北茶山寺唐陸羽嘗寓其地卽山種茶品爲第
四其水似井而傍山色白味甘是爲乳泉以土色赤又名
燕支井湘潭唐世徵詩生爲茶經累季疵禿衿揚杓亦何
辭豈知北郭空山裏占得寒潭雪一池

按歐陽永叔記云羽所說二十水廬山康王谷水第一
無錫惠山石泉第二蘄州蘭谷谿石下水第三峽州扇

子峽蝦蟆口水第四又劉伯芻載羽爲李季卿論水次
第有二十種伯芻以楊子江爲第一惠山石泉爲第二
虎邱石井爲第三丹陽寺井爲第四皆不及信州臘脂
井列之第四好事者所附會耶考茶經祇載山水上江
水中井水下其山水揀乳泉石池漫流者上其江水取
去人遠者井取多汲者初不著次第而此水似井而傍
山色白而味甘殆乳井泉乎當仍舊志曰陸羽泉不當
以第四之名溷之屈之俾博雅者貽誚前志

聖井在永樂鄉湖古山方廣一池中有井深不可測宋大觀

上饒縣志

山川 卷五

三五

間歲旱江元帥道成於此祈禱獲鱗介之屬輒雨相傳井
有七竅或通閩或通洋溪澣或通孟嘉源井

九井在高泉院四時不竭今皆廢止存一井在佛殿前寺僧
架轆轤其上取以供茗

銅塘井在永樂鄉山勢幽邃欲雨則雲氣蒸騰旱禱輒應井
有九登其三則險阻其六不能復深入矣

白龍井在石橋鄉有白龍太子廟

孟嘉源井在永樂鄉

泉洋見水利志

以上水之出於池井者

前志

鐘石灘在縣西八十里灘畔有巨石如鐘

老虎灘在縣西三十里開化鄉灘勢險惡故名

按前志載此灘在縣西三十里而府志則云十里但查

饒境無此灘名則此灘疑是鉛境葉青州下者與鐘石

灘俱爲鉛山境而饒邑誤載之姑附識於此以俟考核

焉

前志

按山川錯載查考維艱茲一一釐正山揆都彙次水分

南北中三條庶幾便於觀覽云

前志

上饒縣志

山川卷五

五

阨塞附

廣信府當八省之衝四境遐遠旁多深山大谷府治雄壯城

周七里南濠因溪帶以天塹北西東濬濠深可丈許廣四

之三金湯之固恃以帖然封禁山險絕陡峻障亘東南而

饒之靈山岑陽芊陽王之草坪峽口廣之柘陽鉢山二渡

鉛之車盤分水溫林弋貴之巴坑鷹潭江潸天花二山興

之橫峯均制勝要區也

上饒東則沙溪路通閩浙玉山要道西則芊陽山勢峻絕其

險可守石溪坊鉛山要道南則岑陽與閩接壤爲南要區

北則鄭家坊踞靈山之下足資保障而要害尤在封禁一山云

封禁山一名銅塘縣南百里近接五五十二三四都廣豐之十五都玉山則相距二百里不相聯界前志謂屬上永玉三縣者非歷代封禁今設高洲源口船坑三汛防守順治十年江西巡撫蔡士英封禁山疏 順治十年正月初四日准工部咨將封禁山有無出產木植查明具奏等因隨查據布政使盧震陽湖東道楊國正具詳查看得封景山原係封禁山初名銅塘因其峭險歷爲盜藪削平之

上饒縣志

山川 卷五

三

後卽請封禁由來舊矣唐代黃巢倡亂僞賊借勢流毒一方繼而葉宗畱賃居燒炭覘險立穴鑄冶田兵謀爲不軌而鄧茂七爲之附援三省搖動幾危信州此前鑒昭然而有據也目今山賊楊文蹲踞其間未經蕩平今一旦輕議開採是啓奸人之亂謀耳况其中所產木植不過臃腫樗櫟原無合用之材兼以巉巖險峻猛獸叢居溪澗不通道路曲折不但開採有百害而無一利且恐徒挑釁隙而無實效等因據此 臣伏查封景山卽封禁山界連上饒廣豐二縣距玉山縣尙二百餘里歷代以來皆行封禁粵稽舊

籍議開數次然卒以無佳木可採有害於民而中止臣奉
躬歷查勘見其峻峯峭壁溪澗之水不通外流且毒螫猛
獸聚以爲巢附山百里人烟杳絕卽所產者盡係良材亦
且人苦於登攀木難於出水况所產不過松楓樗櫟並無
棟梁者乎若開採一行其徒費金錢罔裨實用猶可言也
誠恐驚魂甫定之赤子一經騷擾其害更有不可知者抑
猶有慮焉此山昔爲鄧葉諸寇盤踞後來大費兵力矧今
湖東山逆楊文等正在奮勦依巒負嶠尙繁有徒方苦搜
殄之難覓若此幽深險峻夙深盜藪之處今日一啓其釁

上饒縣志

山川
卷五

三

將來恐難收拾此開採之害更彰明較著者伏乞俯查往
事軫念地方嚴飭封禁安民戢寇兩得攸賴順治十年二
月初九日奉

旨採木有害無利以後不許妄請該部知道欽此

乾隆二十一年江西巡撫胡寶瑑查勘封禁山奏請永禁
疏爲勘明禁山應行永禁情形並現在辦理緣由仰祈

聖鑒事竊臣於二月十四日起程赴廣信查勘封禁山由陸路

星馳前往於十八日由廣郡之上饒至廣豐縣入山復轉
至上饒縣所轄境內將山勢隘口土色樹木及舊設汛地

細查此山原名銅塘山週圍約三百里與閩浙連界而入山之徑俱在江右地方上饒設三汎曰源口曰高洲曰船坑廣豐縣設三汎曰鉉山殿曰下霧嶺曰小峯由各汎而入行二三四十餘里不等抵極峻之隘口爲原立各禁碑地方約計禁內不過百里由禁界入山皆係重巒疊嶂絕壁懸巖其適中之處名曰銅塘卽山所由得名間有零星平地俱屬無多其樹木並無良材臃腫糾蟠蔚翳於峻嶺幽壑之間而山趾錯接多隔澗溪水漲則瀾漫無路山徑壁陡攀藤援木方可登陟而一線懸通數武

上饒縣志

山川 卷五

五

曲折彼此卽不相睹且地皆砂石非裹糧無以爲生惟禁絕其入山之路始可肅靜粵稽前代無不封禁以防姦宄間有建言開禁者勘明卽寢其事 國初仍舊封禁嗣經

原任侍郎

臣

趙殿最前撫

臣

陳宏謀兩次請開經三省勘

明應仍舊制而近年復有議開者蓋亦以自然之利可資墾種可採木植可煎礦砂皆未嘗身親目覩遂疑環山之內當有沃壤平原不知旣無可墾之地亦無可用之材挖土試驗又無礦苗惟崎嶇險峻藏集姦徒則難裹搜剔招張夫眾亦恐聚蟻紛囂官辦則糜費無益民辦則費本

難關且其勢必添駐文武員弁而建署無地貿易不通斷
難孤處巖壑總之禁則並無棄利開則必有遺害嗣後永
宜封禁更無可疑惟稽察之法必加嚴密始無偷入竊墾
以致日久復成匪匿之所臣飭府縣另立高厚界碑鐫刻
大字於隘口當中設立其入山之禁皆令各就地勢界以
籬籬俾禁地瞭然而稽查亦易即著落附近之棚長看守
並將各隘口指定六汛分管以專責成其駐劄該處之巡
檢把總不時周流巡視每年令道府分季稽查縣營分月
察看務令遵照舊例不許陽奉陰違至向因山徑未塞附

上饒縣志

山川
卷五

三

近居民棚戶或竊入樵採嗣後槩行嚴禁以杜其漸而佃
種人戶間有倚傍官山坡崖搭棚居住者多係閩人姦良
莫辨最易滋事應令搬移禁界之外倘有假稱山主招集
容留者即行嚴究如此則仍舊封禁益見界劃分明而防
查嚴密亦不致日久廢弛矣所有臣親行查勘永應封禁
情形並另立禁碑一切辦理緣由理合恭摺奏明仰祈

皇上聖鑒訓示謹奏四月十八日奉到

硃批如所議行欽此

伍諾璽請罷弛封禁山議詳 爲奉覈勘議事該卑府遵

卽率同上饒縣李文耀廣豐縣游法珠於乾隆十九年十一月十二日進山至二十一日出山伏查封禁一山北東西三面皆卑屬之上饒廣豐二縣所轄而南東西則係閩省之浦城崇安所隸而廣豐又有小徑一可通浙衢之江山常山二縣一可通浙處之龍泉景寧二縣三省咸資屏蔽且其間層巒疊嶂險僻陡峻舟楫不通人跡罕至往者萑苻嘯聚穴坏胠篋之徒謀呼亂行載之志乘班班可考我國家以德綏猷絕域風行俾海隅羽族卉儀款關來廷使驛四通百於前代以此彈丸黑子之地原無庸踵循

上饒縣志

山川
卷五

三

封禁之名以彰重者無外之化但思歷來所以封禁之由蓋緣野無可闢之田地無可產之利而深山窮谷實爲藏垢納污之所與其弛禁有莫辨之姦良不若封禁靖地方而安民生職是故也今粵府與該二縣等身履其地雖遠必入雖險必冒雖幽僻必達詳加查勘查上饒縣由高州汎至范家坳民山五里內山岡立有封禁界石進界內山勢深邃樹木陰翳先至西坑余坪地一帶地方查勘西坑內有平坦小塘形一區丈量止有一分一釐零余坪地亦有平坦地二片丈量有一畝四分零三接嶺銅塘岡山嶺

陡險摩證如蟻廟基地雖稍平坦然丈量僅有七釐畧入銅塘心爲禁山之腹心重巒複嶂最易藏奸且地氣旺盛若一經弛禁必滋不軌之謀况丈量大小平地四片僅止畝餘斷難設官建署而銅塘心孤懸山奧即弛禁設官亦不能彈壓稽查自西坑起至銅塘心除丈量平地外餘皆根株蟠結半係沙石無所施其伎倆均無如議者所云臨溪者約可開田二百餘畝平原者約可開田四五百畝之多也又自銅塘心循至羊角尖鴛頸嶺其山形勢豐上銳下偃仄難言兩旁山坑自上望下渺不可際且亂石磷磷

上饒縣志

山川
卷五

三

亦不能開地二百餘畝之多又自雙溪口沿溪而至橙樹坪二處地方雖屬傍臨山澗但地夾砂礫樹根糾纏又奚能墾田至二三百畝之廣由五里排而至石塔坑幽谷曲隈間有平衍之處其地亦不過丈量一十餘畝實不知覲覲行私弛禁公溥之議者何所見而云然也夫自范家坳禁界起至銅塘心自銅塘心而至石塔坑地方禁界止在登陟嶺際臨上而俯視絕壑萬仞杳莫測其所窮肝膽爲之悼慄且更險惡者又莫如老鼠摸壁路容半足諦視崖壑深不可測失步尺寸墜輒糜碎如此巉巖峭壁之險瘴

霧晦冥之地何其難言開闢如此易易也又自源口進至
柯樹嶺八寶岡崇山峻嶺固難墾闢卽楊梅地李子坑亦
地止一窪卽可開墾亦屬無幾螺螄尾立有禁界其下卽
一封書又名葉芳舒及芋荷坑凡山頭地角靡不開種殆
盡况又係界外之官山也又自上會坑民山進至燈盞塘
立有界碑界內全未開動至袁同知所議箬碧尖可以盡
開者勢更難行蓋箬碧尖係屬石山高插雲霄可望不可
及非惟卑府不能躡其嶺際卽登山輕捷如猿猴者亦畏
足不前也其次至廣豐所屬脫衣塘原係禁口現有查出

上饒縣志

山川
卷五

三

界石該處微有開動自脫衣塘至龍門坑蜿蜒而下高山
環繞現墾山地亦屬無多至廳基地方覺稍平坦已有開
墾廳基一逾山澗卽上饒封禁之箬碧尖也磨刀塢雖屬
臨溪或有可以開墾之處亦未可料然藜莽叢塞難以勘
量至坳頭山旁鑄有禁界界內師公墳高低欹側零星私
開田地數十餘畝其餘悉皆亂石實無可開之地大東坑
亦約有零星開田至百餘畝但就地開種不成片段半坑
小東坑均未開動至虎尾岡立有段界山勢高入雲表不
測其仞行者如臨冰淵自虎尾岡下至洞門底禁界遼曼

幽邃筆難殫述洞門底亦有零開田地共二百餘畝該處查有封貯之木六百零一株但未見封貯五萬餘之柴詢至該地練保曰未曾責令收管也詢之游令曰未見封貯檄文也其餘如龍王殿雙溪王瓜坑九井等處無路可通似此絕域荒徼類非人境縱有膏腴繡壤在其中亦棄之如敝屣而况懸揣有田可開有地可闢者也至於該二縣禁內樹木比比皆是蒼蔚菁蔥若積黛遠望疑不可入又未易更僕數也惟有望洋而覷若非神輸鬼運斷難輕出根株蓋無水路可通人力又不能施現如龍門坑洞門

上饒縣志

山川
卷五

三

底二處所伐巨木委置如山任其朽腐無計可施以上卑府逐細確勘徹始徹終悉心籌度實以爲弛禁一道有損無益蓋其說有五夫深山窮谷瘠地荒區一旦弛禁是必招民認墾若本地有力之家斷不甘以有用之財而填無窮之壑或異氓認墾率皆無業窮黎挈妻攜子呼朋引類深入重山厥廬惟崖厥炊惟坎厥寢惟礎始焉力作久無利益糧饋難繼人聚嗷嗷變起不測惟時盡撤三省之藩籬此通彼達其負山固嶠江省搜捕緊嚴則竄伏閩浙閩浙捕治急迫則潛逃江地必致騷擾鄉閭民不聊生此不

宜弛禁者一也若謂弛禁可以開地若干開出若干伐木
變價若干可增國賦若干鑿鑿乎皆不刊之見有用之
言也然不知我

皇上每於水旱之災捐賑不下億千百萬水利城垣等費不下
億千百萬免追免徵之條不下億千百萬寬大之政萬古
爲昭何在乎遐荒絕域之中而直爲之廩廩也况弛禁而
山內可墾之田有限可闢之地無多可取之利無幾所得
不償所失此不宜弛禁者二也卽或弛禁斫伐樹木不知
闔幾何歲月開鑿岑麓而又爬剔其壟且淤者更不知歷

上饒縣志

山川

五

卷五

幾春秋實難屈指而懸望其奏效也况遠方承墾者斷未
有發費而來必官先借給工本矣弛三省之屏障勢必設
官添兵駐劄彈壓矣添設官役勢必設造衙署議增俸工
矣而山路崎嶇陡澗病涉勢必開平道路或設舟楫或成
輿梁矣是弛禁未見種種毫釐之利益而先費無窮有用
之國帑孰得孰失瞭如指掌此不宜弛禁者三也再者招
徠之人趨利如鳧日繁有徒則命盜之事勢所不免然盜
賊必立時擒捕人命必立時相驗似此深山窮谷之中驗
勘緝捕往返難期姑就上邑而論如高洲至范家坳經歷

十八道山澗又自石塔至雙溪口又涉溪河十八處該二處地方均當陡澗深溪之中春夏之交山水驟騰最屬東隘衝激飛沫思冒險以涉却斷斷不能身在險阻之地入既不能出又不得官役多人何以堪此而登涉之勞亦不可窮狀如三接嶺羊角尖鷲頸嶺諸嶺高數百尋石棧峴岑一至其巔咸皆面矜口呿步行不可肩乘竹輿前後必須用布裹縛上山各各挽布魚貫而行猶如舟子牽纜然方可直上下山亦需布垂若一人怯步眾則顛躓跋跲既苦艱難辦公未免需緩則屍身必至潰爛兇盜必至遠颺

上饒縣志

山川
卷五

美

官累民害莫可勝言此不宜弛禁者四也且廣信壤地褊小尤江右之瘠區一年所產米穀不敷一年之食全賴外運接濟一經弛禁荒地必召墾伐木必召商盈千累百聚雜多人姑以千人論計口而食每人每日需米一升則一日需米十碩百日需米千碩以此類推什伯倍蕪在時和年豐之時或可相安無事儻遇水旱不齊之年閭閻蒼生曷能安堵是開疆拓土有無成效尙在遙遙莫必而將坐享百餘年封禁昇平之民先有向隅之泣此更不宜弛禁者五也之數者卑府與該二縣等守令茲土審時度勢反

覆熟壽苟上有禱於國計下無擾於民生中無累於石
司何憚而不爲何樂而不行今旣眞知灼見且咨於眾咸
曰有損無益敢不據實直陳仰請封禁則三省億萬生靈
萬年無疆之福胥慶再造之恩矣

按此山名隸廣信實三省交會之所正北接府屬上饒
縣之五十五十二三四都廣豐縣之十五都正東接浙
省之龍泉江山等縣西南接閩省之浦城崇安等縣山
勢巉巖峭峻攢聚森羅周亘三百餘里徑路險仄石棧
崎嶇中無平田曠土足任墾藝毒螫猛獸聚居良民不

上饒縣志

山川
卷五

三

可托足盜賊則利於入險結巢四出標掠往日鄧茂七
葉宗畱楊文皆流劫盤踞非於中構謀起事也其產率
枳棘楓櫟臃腫不材止可燒炭土人名之曰雜木質重
入水不浮而又無路可出其礦利則厯勘並無礦形亦
絕無銅鐵砂苗前代所去內饒材木礦砂者皆賊徒倡
名煽惑利誘良愚外人不能深入聞風惴息是以有此
舊志所載奏疏皆規切當時無補於今日李鴻考畧亦
止參稽志乘雜採傳聞非有確見難可徵實今寇氛永
靖文武吏比歲入山巡查一一得諸躬親目擊非復向

日懸揣臆度矣惟謹斥堠嚴外匪未雨綢繆計不容弛
耳謹載 本朝蔡胡二撫軍疏及伍守議詳於前以資
慎固封守者之一覽焉

府志

岑陽關縣南百二十里與閩之邵武接壤爲南境要害之地
撩竹關縣南一百里東甌捷徑

八坊塲卽高洲隘縣南八十里在封禁山口山深路阻奸宄
所伏設巡檢司駐防弓兵十五名增設塘汛撥兵戍守

張灣隘在封禁山口舊設快手六十五名今裁

楓林隘在封禁山口舊設快手一百餘名今裁

上饒縣志

山川
卷五

三

鄭家坊鎮靈山下縣北七十里與饒徽鄰境人烟輳集設巡
檢司駐防弓兵十五名

芊陽寨縣西北百里山形險峻僅通一徑中有田可耕邑人
屢避亂於此唐時黃巢之亂屠戮殆盡土人至今能言之

石溪坊縣西南五十里鉛山要道設塘汛戍守

封坑口縣西五十里興安要道設塘汛戍守

沙溪寨縣東五十里玉山要道人烟輳集舊設巡檢司明洪

武間裁今設塘汛戍守

附論

竊惟職方紀九州之地各表其山鎮川浸所以辨疆域
覘風土也而其利之所出民之所生與其穀畜之所宜
俱以山川之精氣而各著其美故凡屬一方之郡縣遂
各分其山之峙而高川之流而長者以爲境內之形勝
上饒爲信郡附郭邑凡山水之美萃於信州者固皆得
而有之而其治內之峻絕而靈長者更足以表全郡之
名鎮而貫諸邑之分流峙乎北者曰靈山高有七十二
峯而凡境內之爲嶺爲巖爲岡爲洞者皆祖之流而西
者曰信江長則四百餘里而凡境內之爲溪爲港爲源

上饒縣志

山川
卷五

五

爲潭者皆歸之山則多石而利用之產亦饒焉川則多
灘而行舟之險無虞焉此其大概然也而其異者石爲
山骨乃其或立或仆或跪於川流之中者往往出爲奇
觀泉爲川源而其仰出側出穴出於山巖之際者一一
成爲名跡是爲他郡之所罕見蓋天鍾美於是以爲江
右東北之雄州獨標其勝者而其水土之精氣所凝正
非物產之美利所能獨當誠如昌黎所謂必有魁奇忠
信材德之士出乎其間有可觀諸古而知乎今者焉考
其前賢往哲大都敦端潔而尙氣節謂非得於山川清

高之氣也歟至其山之僻處一隅而稱爲險要者曰封
禁山在

聖朝可無虞伏奸之害而亦非有啓疆之利則永宜封守固
未可輕議者矣

二卷系示山小

四

